

involucri glabri *squamis imbricatis latis obtusissimis omnibus callosomucronatis*, infimis *subrotundis*, caeteris sensim elongatis intimis ellipticis, floribus intense luteis involucrum superantibus, acheniis (immaturis) quadrangulis striatis laevibus basi subattenuatis pappo albo eis longiori superatis.

Hab. in *Arabiae Petraeae* regione *Huara* et prope *Djeddam* Schimper No. 207 et 827.

Planta speciosa 1-5 pollicaris, foliis et habitu *Chrysanthemum segetum* quodam modo referens, capitulis magnis et involucro *Picridii*, sed propter achenia, quae mihi, etsi immatura, laevia omnino visa sunt, *Zollikoferiae* adnumeranda, a speciebus praecedentibus radice annua, involucri squamis latis etc. distinctissima.

*BARKHAUSIA KOTSCHYANA* Boiss. loc. cit. Febr. 1845. (Sect. *Anisoderis* DC.)

B. annua, *caule pumilo hirtulo*, folioso simplici vel dichotome ramoso 2-5 cephalo ramis erecto-patulis foliis oblongo-lanceolatis pinnatifido-lyratis rarius subintegris infimis in petiolum longe attenuatis, caulinis sessilibus basi auriculatis dentatis pedunculis squamulâ unâ alterâve instructis, fructiferis apice incrassato-clavatis, capitulis parvis rotundis, involucri squamis tomentosissimis, praeterea dorso setis flavidis tenuibus glandulosis copiose hispidis, infimis paucis lineari-lanceolatis dimidio brevioribus calyculum formantibus, caeteris oblongis latis acutiusculis post anthesin naviculari-compressis achenia marginalia foveantibus, floribus luteis involucro vix superantibus, acheniis hirtulis striatis *marginalibus incurvis erostratis*, centralibus *in rostrum eis dimidio brevius attenuatis*, pappo niveo achenio dimidio breviori.

Hab. in *Persia australi* prope *Schiraz* et *Persepolim* Kotschy No. 173, 289 et 690, inter *Fasa* et *Schiraz* Aucher No. 4876.

Planta 2-6 pollicaris, capitula illis *Barkh. foetidae* minora et breviora illa *Hispidellae hispanicae* referentia sed minus longe et crebrius ciliata. Species ex affinitate *B. foetidae* et *zacynthiae*, distinctissima squamis involucri brevibus latis, acheniis brevissime rostratis.

*CREPIS DIVARICATA* Boiss. et Heldr. loc. cit. Febr. 1845. (Sect. *Eucrepis* DC.)

C. rhizomate crasso caespitose vestigiis petiolorum vetustorum vestito, caulibus glabris glaucescentibus humilibus a basi divaricatis

*ramosissimis ramis intricatis*, foliis parce asperis radicalibus lanceolatis in petiolum attenuatis pinnatipartitis lobis brevibus acutis triangularibus basi confluentibus, foliis caulinis ad dichotomias sitis linearilanceolatis, capitulis ad extremitatem pedunculorum subnudorum post *anthesin incrassatorum solitariis ovatis*, calyculo phyllis 3-4 linearibus brevibus constanti, involucri foliolis adpressis oblongis *medio dorso nigrescentibus* utrinque *indumento niveo adpressissimo tomentellis*, floribus luteis subtus purpureis, acheniis aliis albidis substriatis sterilibus, aliis oblongo cylindricis basi apiceque subattenuatis 10-12 striatis ad strias apicem versus scabriusculis, pappo niveo achenium aequanti.

Hab. in rupestribus et pascuis saxosis regionis superioris *Taygeti*, ubi Augusto et Septembri floret de Heldreich 1845.

Caespites vix semipedales e caulibus patule ramosissimis rigidis crassiusculis subnudis formati, rami monocephali 2-3 pollices longi apice post anthesin incrassati, capitula magnitudinis eorum *C. tectorum* vel *Nicaeensis*. Species habitu et squamis involucri distinctissima prope *C. oporinoidem* collocanda, *Crepidi alpinae* Vill. quoque affinis.

CREPIS CROCIFOLIA Boiss. et Heldr. loc. cit. Febr. 1845. (Sect. *Eucrepis* DC.)

*C. glaberrima*, rhizomate crasso multicauli nigro petiolis vetustis squamoso, foliis fere omnibus radicalibus glauco-caesiis integerrimis gramineis linearibus, infimis subspathulatis obtusiusculis, caeteris acutis, *caulinis paucis* anguste linearibus abbreviatis, caulibus tenuibus erectis elongatis subsimplicibus parce foliosis, capitulis terminalibus longe pedunculatis obconicis abbreviatis paucifloris, involucri nigricantis albo tomentelli squamis infimis brevioribus triangularibus subpatulis caeteris linearibus, floribus flavis involuero duplo longioribus, acheniis pallidis glabris fere estriatis *apice paululum attenuatis*, pappo sordido eis breviori terminatis.

Hab. in regione excelsiori *Taygeti* locis *Choupata, Hagios, Paraskev* dictis, ubi detexit cl. de Heldreich Julio et Augusto 1845.

Folia 2-3 pollicaria 1-2 lineas longa, caules graciles pedales. Simillima habitu *Hieracio porrifolio* sed ab eo generice distincta acheniis apice attenuatis nec columnaribus et specificice colore nigrescenti, rhizomate crasso multicauli, caulibus subsimplicibus etc. Species distinctissima.